

Turismo na Krusada

Na fin di 1992 e Komishon "Aserkamentu Sosio-ekonómiko Integral pa Boneiru a entregá su rapòrt. Nan a evalua djaserka "e ardu mayó di nos ekonomia," turismo, i a duna surgerensianan pa ku su futuro. Den ultimo dianan nos tambe a tende punto di bista di direktor di Tourism Corporation Bonaire (TCB), señor Ronny Pieters, pa ku futuro di turismo na nos isla. Ta parse ku perspektiva di tantu e Komishon komo di señor Pieters ta ku Boneiru a yega na un krusada importante. Ta tempu pa nos isla evaluá kiko nos prioridatnan mester ta pa ku e industria ku sin duda lo sigui hunga un papel eksepsionalmente importante pa nos tur. Ta bon pa nos reflekshoná tokante e prioridat aki.

Turismo por ta algu sano pa nos isla. For di turistanan nos por siña tokante otro parti di mundu, i haña ideanan kon nos por mehora nos sistema i kustumbernan. Nos idioma presioso, Papiamentu, ta enrikesé pa palabranan ku nos ta fia di otro lenga. Pasobra naturalesa di nos isla ta atraé turistanan, pesei nos ta hasi esfuerso pa konservá nos medio ambiente i tene nos isla limpi. I e turista ta bin ku plaka, loke ta duna un empuhe na tantu nos ekonomia nashonal komo nos pòtmòn personal resultando den un adelanto den nos nivel di bida.

Pero turismo tambe tin su banda negativo. Ta un echu ku turismo ta kontribuí na e dekadensia moral di nos komunidad. Ora hende ta na nan mes pais nan ta sinti un sierto restriksion moral pasobra nan ke mantene nan reputashon. Ma ora nan ta borda un avion òf barku i ta haña nan na un lugar ku ningun hende konose nan, nan por tin tendensia di laga nan stèndertnan moral slèk i kisas bandoná nan por kompleto. Kos ku nunca nan lo riska hasi na nan propio pais, nan ta hasi trankíl na Boneiru. Esnan ku tin kontakto ku e stranheronan aki tin ora ta demasiado "servisial." E turista ta regresa na su pais, lagando nos komunidad pa kosecha e fruta di su libertinahe: malesanan venérikò, AIDS, matrimonionan kibrá, bahamentu di stèndertnan moral, èts? Si esei ta e preis ku nos tin ku paga pa progreso di nos isla, e preis ta muchu karu! Beibel ta bisa "...fornikadornan (kualke inmoralidat sèksual) i kibradornan di matrimonio (adulterio) Dios lo husga nan" (Hebreonan 13:4).

Pa nos tin un industria di turismo sano na nos isla, nos no por sigui tolerá kiko ku ta djis pa bienestar di turismo. No ta nada straño pa mira turista kana mitar sunú riba kaya. Esei ta aseptabel pasobra e ta turista? Sigur nos lo no reashoná asina si tabata un yu di tera ta kana riba kaya asina. I pa bai un tiki mas leu, maske lei ta prohibí landamentu tòples òf sunú, i nos outoridatnan a fasilitá e turista i a designá un sitio unda esaki por sosode legalmente, tòg nos ta tolerá desnudes na playanan publiko. Algun di nos no ta protesta ku esei ta dañá e moralidat di nos puebel pasobra nan ta turista i nos tin miedu di perde e plaka ku nan ta trese?

Beibel tin rason ora e ta bisa, "Raís di tur malu ta amor pa plaka" (1 Timoteo 6:10). Pa nos haña algun florin mas nos ta ignorá e tragedia moral i krimennan serio ku esaki por okashoná.

Turismo di Boneiru ta na un krusada den kamina. Ta tempu pa nos kambia nos mentalidat. Ta tempu pa nos bandona e idea ku loke ta bon pa turismo ta bon pa Boneiru i loke ta perhudiká e industria aki automatikamente ta malu pa nos isla. Nos no mester permití e turista imponé su stèndert di moralidat (òf falta di stèndert) riba nos komunidad. Nos mester kuminsa proteha e moralidat di nos yunan, nos hobennan, nos komunidad. E industria turístiko mester notifiká e turistanan ku nos isla tin sierto stèndert i ku sierto kos no ta aseptabel (manera otro pais sa hasi). Polis tambe lo mester duna man pa sòru ku nan ta komportá nan segun nos leinan. I si esei kier men menos turista pa Boneiru, nos lo mester hasi e sakrifisio ei pasobra tin kos di muchu mas balor ku e plaka ku e turista ta trese, i moralidat sigur ta un di e balornan ei. Nos por sobrebibí sin nan sèn, pero nos no por sobrebibí sin moralidat.

No mal komprende. Mi no ta kontra turismo. Ma nos mester realisá ku balornan spiritual i moral mester tin preferensia riba e industria turístiko. Ta bon pa nos kòrda ku un dia kada pèrsona lo mester para dilanti Dios. E lo "trese tur echu na huisio, tur kos ku ta skondí, sea bon òf malu" (Eklesiastes 12:14). E dia ei solamente nos relashon pa ku Kristo Hesus lo konta; no e plaka i prosperidat ku turistanan a trese na nos isla.